

清江貝先生集

清江貝先生詩集卷之五

七言律詩

送襲封衍聖公孔希學還闕里在京作

星斗光芒萬丈騰
賜書連舸出金陵
鴈違青塚天將雪
馬度黃河夜已冰
博士經存終漢出
上公爵重自唐升
喜聞手植庭中檜
翠接東蒙幾百層

送愚上人歸越中并柬奎方舟長老

在京作

天界歸來亦已遲
庭松此日定回枝
山中結社無靈運
海上留衣有退之
鶴去雲霄隨錫杖
龍收風雨入軍持
西湖若見方舟老
為說三生夢裡詩

觀海與鮑仲孚同賦

弱水之外有蓬萊雲中髣髴金銀臺終驅汎濫群流合
始與鴻濛一氣開石壁三更看日上星槎八月到天回
麻姑何處窺清淺近日無書寄鶴來

送王克讓員外赴陝西

貂裘萬里獨衝寒舊是含香漢署官白雪作花人面落
青山如鳳馬頭看關中相國資王猛海內蒼生望謝安
應念東南有遺佚采芝深谷尚盤桓

送戶部尚書貢泰甫開司閩中權鹽易米給京師
昨日除書下五門地兼中外亦殊恩三山迥出南荒小
八座元同北斗尊悟主已知如內相封侯終見自公孫
荆揚樂土今凋瘵他日從容為一言

兩隅未靜出師頻聖主經營伏老臣
天河轉粟遙通薊臘月看花近到
閩道上豺狼應避馬山中猿鳥不驚
人公餘定有詩千首好託邊鴻寄蚤
春

題徐大章白鶴山居

孤烟一曲紫雲村好客尋常遠到門
水落已知魚可笥夜深不畏虎夔藩
隣人送酒酌花下稚子讀書當樹根
白鶴千年時過此山中還有令威孫

三月晦日

王師未下姑蘇臺客子野次獨徘徊
城南酒徒不復見院裏桃花空亂開
兒女新年俱已長弟兄何日却同回
故人千里寄書至相約山中拂紫苔

寄內弟陸熙之

我別禦兒溪上宅月當二十四迴新如何萬國尚戎馬
即恐四隣非昔人簫鼓誰家猶作杜樓臺廢苑不成春
夜寒憶尔無由見悵望黃姑析木津

寄潘時雍

潘岳閒居學灌園一椽茅屋近青門野烏得食頻將子
慈竹團陰定長孫賓客過門車蓋合兒童汲井輓轡喧
春風金谷空流水且共高歌醉瓦盆

送翁鎮方歸天台

雲氣空濛是赤城高歌歸去不勝情天傾滄海東南迴
地接丹丘日夜明念我好將黃獨寄知君先向石橋行

春風一路啼鶯巧定有花間窈窕迎

題雲溪耕隱

屋外青山青似蓮雲溪隱者即神仙桑麻杜曲非無地
雞犬桃源別有天載酒隣翁時叩戶賣魚溪女不論錢
卧龍何事煩三顧祗合隆中老歲年

題丁成之清樾軒

九龍山前處士宅草堂低小盡青苔樹陰滿地日不到
水氣著人秋已回無數黃鸝相對語有時翠碧忽飛來
移床與客竹間坐千里好風何快哉

鄭憲卿省郎織毯松江還詩以送之

鶴城翠織出天機卷付星查使者歸瑞草奇花春欲動

彩鸞青雀畫交飛
峒人不用誇山尉
朝士何須惜地衣
聞說千秋佳節近
吳宮高會更光輝

雲間見李克敏將歸吳陵作詩為別

與子西東二十霜
尚思年少醉錢唐
人間日月如行客
馬首山川忽異方
歷歷早鶯初變語
翩翩歸鴈未成行
明朝陌上重分袂
更盡吳姬酒一觴

賦小瀛洲

海上瀛洲碧水新
地連方丈絕風塵
九光霞館邀王母
一曲鸞笙降玉晨
若木迴枝長掛日
桃花結子不知春
祖龍謾自求方士
却恐流傳語未真
仙人長住白銀宮
不似淮王禮八公
日月自周三島外

山川盡縮一壺中
赤麟紫鳳池臺勝
姮娥女河車服食同
清夜步虛相和處
琪花如雪又春風

題苧溪漁友宅

徵君白苧溪頭住
細雨斜風一短簑
山木兩邊啼杜宇
浪花千頃落鴛鴦
故人且復辭光武
使者何須訪志和
我亦買田來結屋
沙棠船小日相過

十月聞雷

天氣初寒春尚賒
坎中夜半有鳴蛙
百年宇宙腥戎馬
十月雷霆起蟄蛇
老柳黃垂霜後樹
小桃紅破雨中花
三公燮理非無術
愁聽空江度鬼車

靈鷲觀燈

天樂風傳應壑雷
驚峰春色似蓬萊
一天象緯迎秋轉
千月龍宮徹夜開
西國胡僧依樹坐
上方玉女散花來
夜深借榻山房宿
更欲題詩到二臺

謝買齊臣惠碧盃

萬里堅昆來碧盃
青蓮十葉類天成
于闐蒼玉本同色
韶州白甕空得名
馬潼可能羞北饌
駝蹄且復薦南烹
茅齋此日足家具
一詩為報故人情

題靜天鏡碧水春軒

綠波如酒不成潮
一曲潛通海眼遙
祗樹園深青鳥下
桃花浪暖白魚跳
踈星夜列開天鏡
細雨朝飛落虹橋
杜老賦詩須重過
遠公結社肯相邀

送興福寺長老鎮靜庵

西山樓閣涌波濤西國高僧見白毫貝葉有又留藏室
天花無跡上方袍毒龍在鉢秋雲濕馴虎當門夜月高
聽法他年陪相國定因元亮置松醪

六月三日泛舟

六月三日好天氣清江轉枕雨晴初樹頭雲歛出紅日
石脚水生跳白魚何處老翁還獨釣可憐遊子未安居
野王堆前三女竇得意唱歌隨所如

七夕

滄江雨歇暑漸微銀床一葉迎秋飛牽牛相對織女出
明月不照征夫歸寸心耿耿只自苦雙鬢蕭蕭今更稀

仰候神光向中夜秋螢暗度鴛鴦機

十一月廿三日夜集次韻盧廷舉一首

河橋春向柳條歸買酒從教更典衣倒海北風三日盛
著人南雪六花飛銅盤燒蠟詩初就羯鼓催觴令不違
身後空名亦何用獨憐張翰早知幾

剪韭軒

三韭行厨亦浪誇傍人猶笑庾郎奢春宵翠截山中葉
臘月黃分雪後芽野飯猶能留上客俠鯖豈復到貧家
盤中一筋青絲細絕勝蕪菁散作花

題玉士亭看山處

看山何處候神仙地近城南尺五天林屋雪消攢玉筍

上方雲斷出青蓮行人獨去西風裏倦鳥雙迴落照邊
此日騎曹誰記馬閒支手板思悠然

元夕次韻鐵崖楊先生

元戎出號初鳴鐸狂客忘歸更賦詩貔虎千屯防要地
魚龍百戲夢清時月臨粉堞南樓靜天接滄江北斗垂
可得夜遊重秉燭佳人雙唱玉交枝

二月十六日雨中遣興

城頭落日啼乳鴉城中烟火冷千家斷雲漠漠夜還合
急雨紛紛風更斜世亂不歸空洒淚春深何處獨看花
白龍堆前水二尺明日泛舟携紫霞

清明日陪楊鐵崖飲城東門是日風雨

盪舟撾鼓出東門
恹雨盲風野色昏
海上一春猶作客
樓頭三日共開樽
青山石馬新人塚
錦樹黃鸝舊相園
快意百年須痛飲
轉頭何處不銷魂

送凌彥冲歸杭

正好聽君蘇武慢
傾壺共坐白鷗沙
十年戎馬猶塞路
三月歸舟催到家
江燕與人同是客
野桃成子亂飛花
使回多寄平安字
要看張顛醉墨斜

寄林叔大

湖州別駕三年別
文采風流想見之
水晶宮裏無傳箭
浮玉山前多賦詩
海燕空歸尋舊宅
吳蠶未老賣新絲
金閨學士臨池處
還與何人話昔時

槐陰亭

雲團車蓋起童童
文正三朝相業隆
種樹百年蟠厚地
讀書六月坐清風
蟬吟露葉初回夢
蟲吐秋絲忽墮空
今日洛陽卿相宅
牡丹誰看狀元紅

即事

少海旌旗落照中
沙陀兵馬鴈門雄
朝宗久廢諸侯禮
翊戴方尊節度功
今日宣宜求騎劫
當年應失倚全忠
丹書鐵券存終始
萬古山河帶礪同

經故內

山中玉殿盡蒼苔
天子蒙塵豈復迴
地脉不從滄海斷
潮聲猶上浙江來
百年禁樹知誰惜
三月官花尚自開

此日登臨解題賦白頭庾信不勝哀

立夏日

江寒雨急仍北風扣戶喜聞南巷翁錦城鮓送蒲芽白
玉盞酒瀉桃花紅三月忽驚春似客百年那得老還童
一雙黃鸝寂無語飛過小月高樓東

題雲深處

朝看雲出暮雲歸翁住雲深已息機海上仙人教種藥
山中玉女未收衣湏知倏忽神龍變已作細縕野馬飛
我亦無心共來往五城宮闕夢竟稀

題夏士文園亭

窓戶青紅竹裏開竹深無地著塵埃山移閭苑千峯出

水接銀河一道迴釀酒每留賓客醉賦詩重許老夫來
暖風遲日春如海隨意何妨坐綠苔

重午

北里共持菖歎酒南翁未解木綿裘白波青嶂三吳地
恠雨盲風五月秋揮淚幾時朝鳳闕招魂何處覓龍舟
海榴一點紅如火時序催人共白頭

瑞蓮

雙花相向復相輝白帝西遊擁一妃羽蓋風清朝並載
珠宮月冷夜同歸翠房已作鴛鴦結紅粉那成蛺蝶飛
亭上酒醒香不斷滿汀暮雨濕仙衣
秋水嘉蓮瑞一門初花驚見出同根弄珠漢女無留跡

鼓瑟相靈有返魂相府昔年曾製曲仙家今日重開樽
合歡何限風流意怨綠愁紅謾自繁

題淵明像

素琴無絃不復鼓清樽有酒還相持老奴遷鼎亦苦早
先生拂衣應已遲子房結客報秦日武侯出師匡漢時
古人今人本同調坐對南山惟賦詩

題松鷲山居圖

仙客盧敖東海頭好山百轉接丹丘開田種玉一千頃
閉戶讀書三十秋雲氣上天如白鶴茯苓入地化青牛
年來浪跡吳淞道夢裏猿聲憶舊遊

寄奎方舟俊用章二上人